

Biblia alang sa Kabataan motanyag



Langit, Ang
Nindot nga
Puluy-anan
sa Dios



Gisulat ni: Edward Hughes

Gihulagway ni: Lazarus

Gipahaom ni: Sarah S.

Gihubad ni: Christian Lingua


Gipagawas sa: Bible for Children
www.M1914.org

©2018 Bible for Children, Inc.

Pagtugot: Mahimo kang mokopya o mopatik niini
nga estorya, ayaw lang ibaligya.




Sa dinhi pa si Jesus sa kalibotan, gisultihan Niya ang Iyang mga tinun-an bahin sa Langit. Gitawag Niya kini nga "Balay sa Akong Amahan," ug miingon Siya nga naay daghang nindot ug dagkong balay. Ang Langit mas dako ug mas nindot kay sa puluy-anan sa kalibotan.



Si Jesus miingon, "Moadto Ako aron mag-andam ug dapit alang kaninyo. Unya mobalik Ako ug dad-on kamo Nako." Miadto si Jesus sa Langit human Siya nabanhaw. Sa nagtan-aw ang Iyang mga tinun-an, naisa si Jesus, ug ang panganod midawat kaniya hangtud nga Siya nawala sa ilang panan-aw.






Sukad niadto, ang mga Cristohanon naghinumdom sa saad ni Jesus nga moabalik ug kuhaon sila. Miingon si Jesus nga kalit siyang mobalik nga dili magpahibalo. Pero maunsa man ang mga Cristohanon nga mangamatay sa dili pa Siya mobalik? Ang Biblia nagsulti nga deretso sila makig-uban kang Jesus. Ang ilang pagkawala sa lawas maoy


paka-kauban
nila sa Ginoo.



Ang Pinadayag mao ang kataposan libro sa Biblia. Nagsulti kini kanato unsa kanindot ang Langit. Ang labing nindot didto sa Langit mao nga tua didto nagpuyo ang Dios. Ang Dios naa bisan asa, pero ang Iyang trono tua sa Langit.




Ang mga anghel ug ubang langitnong mga binuhat nagsimba sa Dios didto sa langit. Mao usab ang gibuhat sa nangamatay na nga katawhan sa Dios ug miadto na sa langit. Nagkanta sila og pinasahi nga mga awit sa pagdayeg sa Dios.




Aniay pipila ka mga pulong gikan sa usa sa mga
gikanta: **ANGAY KANG DAYGON KAY GILUWAS**
NIMO KAMI NGADTO SA DIOS
PINAAGI SA IMONG DUGO
GIKAN SA TANAN TRIBO UG
NASOD UG GIHIMO KAMING
MGA HARI UG
MGA PARI
NGADTO
SA ATONG
DIOS.
(Pinadayag
5:9)




Ang kataposang mga pahina sa Biblia naghulagway sa Langit ingon nga "Bag-ong Jerusalem." Dako kaayo kini ug may habug nga paril sa gawas. Ang paril hinimo sa bato nga haspe, tin-aw sama sa kristal.




Ang gisukaran sa paril napuno sa mga alahas ug mahalong mga bato, naggilakgilak sa lainlaing kolor. Ang mga kagkong pultahan hinimo sa dagko kaayong perlas.




Kadtong mga pultahang perlas kanunay nga abli.
Mosulod kita ug tan-awon nato ... WOW! Mas nindot
ang pagkabuhat sa sulod sa langit. Ang syudad
hinimo sa puro nga bulawan, morag tin-aw nga bildo.
Bisan ang mga
karsada
bulawan.




Usa ka nindot, tin-aw nga sapa ang nagaagas gikan sa trono sa Dios. Sa kada kilid sa sapa dunay kahoy sa kinabuhi nga unang nakita didto sa Tanaman sa Eden. Espesyal kaayo kining kahoya. Mamunga kinig napulog-duha ka klase nga mga prutas. Usa ka klase kada bulan. Ug ang mga dahon sa kahoy sa kinabuhi maoy itambal sa mga nasod.



Ang langit wala magkinahanglan sa adlaw o bulan aron pagdan-ag. Ang kaugalingong himaya sa Dios milukop paghatag ug kahibulongan kayahag. Walay gabii didto.



Bisan ang mga mananap didto sa Langit nagkalainlain. Silang tanan anad ug amigo. Ang mga lobo ug mga karnero kaubang nagkaon sa balili. Bisan ang mga baye nga liyon nagkaon ug uhay sama sa baka. Ang GINOO nag-ingon, "Dili sila magpasakitay o mag-away diha sa tanan Nakong mga bukid nga balaan."



Sa paglibot nato, atong mamatikdan nga dunay mga nakulang sa Langit. Walay madungog nga mga pulong sa kasuko. Walay nag-away o naghinakog.



Walay trangka ang mga pultahan, kay wala may kawatan sa Langit. Walay bakakon, tigpatay, maglalamat, o uban pang daotan nga mga tawo.

Walay bisan unsang sala didto sa Langit.




Wala nay maghilak didto sa Langit kauban sa Dios. Usahay, ang katawhan sa Dios mohilak tungod sa grabing kaguol dinhi niining kinabuhia. Sa Langit, pahiran sa Dios ang ilang mga luha.



Wala nay kamatayon didto sa Langit. Ang katawhan sa Dios makig-uban sa Ginoo sa kahangtoran. Wala nay kagul-anan, wala nay mohilak, wala nay kasakit. Wala nay masakit, wala nay pagbulag, wala nay paglubong.


Ang tanan malipayon didto sa Langit hangtod sa hangtod kauban sa Dios.



Ang labing nindot sa tanan, ang Langit para sa tanang bata nga lalaki ug babaye (ug sa mga dagko usab) nga nagtuo kang Jesu-Cristo nga ilang Manluluwas ug nagsunod Kaniya nga ilang Ginoo.



Didto sa Langit adunay dako nga libro nga gitawag nga Libro sa Kinabuhi nga iya sa Nating Karnero. Puno kini sa ngalan sa mga tawo. Nakahibalo ka ba kinsang mga ngalan ang nasulat didto? Ang tanang mga tawo nga nagsalig kang Jesus. Naa ba kaha ang imong ngalan didto?



Ang kataposang gisulti sa Biblia bahin
sa Langit nindot nga imbitasyon.



“Ug ang Espiritu ug ang pangasaw-onon moingon, 'Dali ngari!' Ug siya nga nakadungog pasultiha, 'Dali ngari!' Ug siya nga giuhaw paduola. Ug bisan kinsa kadtong gusto, paimna sa tubig sa kinabuhi nga walay pagkuto.”



Langit, Ang Nindot nga Puluy-anan sa Dios

Estorya gikan sa Pulong sa Dios, ang Biblia,

makita sa

Juan 14; 2 Corinto 5;
Pinadayag 4, 21, 22

"Ang pag-abot sa Imong mga Pulong
nagahatag og kahayag." Salmo 119:130



Ang Kataposan



Kini nga estorya gikan sa Biblia nagasulti kanato bahin sa kahibulongan nga Dios nga nagbuhat kanato ug gusto Niya nga kita makaila Kaniya.

Nahibalo ang Dios nga nakabuhat kitag daghang daotan. Gitawag Niya kini nga sala. Kamatayon ang silot sa sala. Pero nahigugma pag-ayo ang Dios kanato. Iyang gipadala ang bugtong Niyang Anak nga si Jesus aron mamatay sa Krus ug silotan tungod sa imong mga sala. Unya nabanhaw si Jesus ug mibalik sa Langit! Kon motuo ka kang Jesus ug mohangyo nga pasayloon ka sa imong mga sala, himoon kana Niya! Moanha Siya ug mopuyo sulod kanimo karon, ug mopuyo ka uban Kaniya hangtod sa kahangtoran.

Kon motuo ka nga kini ang tinuod, ingna ang Dios:
Ginoong Jesus, ako nagatuo nga Ikaw Dios, ug nahimong tawo aron mamatay alang sa akong mga sala, ug karon Ikaw nabuhi pag-usab.
Anhi sa akong kinabuhi ug pasayloa ang akong mga sala, aron mabag-o ang akong kinabuhi karon, ug unya makig-uban ako Kanimo hangtod sa kahangtoran. Tabangi ako nga motuman Kanimo ug magkinabuhi alang Kanimo ingon nga Imong anak. Amen.

Basaha ang Biblia ug pakigsulti sa Dios kada adlaw! Juan 3:16

